

Na osnovu člana 54. Zakona o organizaciji organa uprave u Federaciji Bosne i Hercegovine („Službene novine FBiH“, broj 35/05), člana 9. stav 3. Zakona o internoj reviziji u javnom sektoru u Federaciji Bosne i Hercegovine („Službene novine FBiH“, broj 47/08, 101/16), člana 13. i člana 16. Odluke o organizaciji službi Grada Zenica („Službene novine Grada Zenica“, broj 2/17) i člana 7. Zakona o Gradu Zenica („Službene novine FBiH“, broj 80/14) u vezi sa članom 34. Statuta Grada Zenica („Službene novine Grada Zenica“, broj 5/15). Gradonačelnik Grada Zenica, donosi

ODLUKU o osnivanju Službe interne revizije

Član 1.

Ovom Odlukom se osniva Služba interne revizije kao samostalna služba Grada Zenica (u daljem tekstu Služba interne revizije), određuje njena nadležnost, odgovornost, unutrašnja organizacija i način rukovođenja, kao i druga pitanja od značaja za organizovanje i rad Službe interne revizije.

Služba interne revizije je organizaciono i funkcionalno direktno i isključivo odgovorna Gradonačelniku.

Član 2.

Služba interne revizije obavlja poslove sistematičnog pregleda i procjene upravljanja rizikom i internih kontrola, procjene adekvatnosti i efikasnosti sistema finansijskog upravljanja i kontrole u smislu:

- identifikacije rizika, ocjene rizika i upravljanja rizikom od rukovodioca organa uprave Grada Zenica;
- ispunjavanje zadataka i postizanje definiranih ciljeva Grada Zenica;
- ekonomične, efikasne i djelotvorne upotrebe resursa;
- usklađenosti s uspostavljenim politikama, procedurama, zakonima i regulativama;
- čuvanje sredstava Grada Zenica od gubitaka kao rezultat svih vidova nepravilnosti;
- integriteta i vjerodostojnosti informacija, računa i podataka, uključujući procese internog i eksternog izvještavanja.

Poslovi iz stava 1 ovog člana uključuju naročito:

- izradu strateškog i godišnjeg plana interne revizije baziranih na procjeni rizika;
- provedbu interne revizije budžetskih korisnika Grada Zenica;
- provedbu interne revizije pravnih lica u većinskom vlasništvu Grada Zenica;

- izradu izvještaja o obavljenim internim revizijama te izradu godišnjeg izvještaja o aktivnostima interne revizije;
- praćenje realizacije datih preporuka navedenih u izvještaju o obavljenoj internoj reviziji,
- saradnja sa Centralnom harmonizacijskom jedinicom Federalnog ministarstva finansija i Uredom za reviziju institucija u Federaciji BiH;
- obavljanje ostalih poslova u skladu sa zakonom i podzakonskim propisima koji regulišu oblast interne revizije u Federaciji BiH.

Član 3.

Radom Službe interne revizije rukovodi rukovodilac Službe interne revizije.

Rukovodilac Službe interne revizije obavlja poslove organizacije i rada Službe interne revizije i odgovoran je za korištenje finansijskih, materijalnih i ljudskih potencijala dodijeljenih Službi interne revizije.

Rukovodilac službe interne revizije ima prava i dužnosti pomoćnika rukovodioca organa državne službe ukoliko posebnim propisom nije drugačije određeno.

Član 4.

Unutrašnja organizacija i sistematizacija radnih mjesta u Službi interne revizije se uređuje Pravilnikom o unutrašnjoj organizaciji gradskih službi Grada Zenica.

Član 5.

Sredstva za rad Službe interne revizije se obezbjeđuju u Budžetu Grada Zenica.

Član 6.

Odluka stupa na snagu danom objavljivanja u „Službenim novinama Grada Zenica“, a primjenjivat će se od 01.03.2018.godine.

Broj: 02-49-4638/18
Zenica, 21.02.2018. godine

